

مشكلة

السيد

س

تأليف : محمد موسى

رؤية وإخراج : محمد خميس

المشهد الاول

غرفة بيضاء....غالية ما بها أبيض....بها مكان نوم...مكان طعام....مكان جلوس ..وكلها رمزية جداً
خلفية الحجرة عليها كتابات متعددة...ودوائر ومستطيلات..رسومات أخرى غير مفهومة..

- السيد (س) جالساً يتناول طعامه...يتنقل من مقعد الى آخر...يحمل طبق الطعام..يسير به يبحث عن
مكان آخر...يضع الطبق فوق السرير..يجلس يأكل على السرير..ثم يقوم بعصية يحمل الطبق مرة
أخرى يدخل تحت السرير...ثم بعصية محدثاً شخص وهمي :

س : طب أكل منه لقمه..حته صغيرة..ماهو مش معقول تاخده زى ماهو ..ياساتر...ياساتر يارب..الواحد
مش لاقى مكان كويس ياكل فيه بعيد عنك يا أخى..بعيد عن عينيك اللي بتبصلى
(لحظة يلقي طبق الطعام بعيداً بعصية)

ايه؟ انت بتبصلى كده ليه؟؟...هه...مش معقول كده ياأخى..حتفضل قاعد كده ملكش شغله إلا تبصلى؟؟
عيب عيب حتى تسمح لنفسك إنك تسمع كلام ميسركش...ومع ذلك شوف..شوف برضو ولا كانى
بكلمه؟! يا أستاذ حضرتك عاوز منى ايه بالظبط؟

(ج) : (يتمتع بعبارات غير مفهومة)

نعم... أرجوك..وضح كلامك لأنى مش بفهم ولا جملة من الجمل اللي بتقولها
(يتحرك مع الشخص الوهمى ينظر اليه وهو يسير)

يبتعد عنه....يحدثه وكأنه جالس على السرير

ايه ده؟؟انت حتعل ايه...ياأستاذ ده سريرى فاهم؟؟

ج: (يخطب) ..أظن ميصحش أن الإنسان يعتدى وبإصرار على حقوق أنسان آخر معتقداً انه يقوم بعمل جليل ونافع لخدمة الإنسانية ولخدمة الأمال العريضة لكافة هذه القطاعات المترامية الأطراف والمختلفة النوازع والأفاق ..وهولاء المعتقدين بأن الحتمية الضرورية والجوهرية لأن يكون الإنسان باقى فى أى شريحه حياتية يعتقدون من منطلقات متعددة المآرب والمشارب..والإنطلاقات الجوهرية لهذه الحركات الإبداعية تتلخص فى إننا..يجب وبقوة أن لا يأخذ إنسان اى حقوق إنسان آخر...مهما كانت هذه الحقوق ومهما كان هذا الإنسان ..

علشان كده وبناء على ماسبق قوله... (بعصبيه) ..إنفضل غور من هنا ... (بإستجداء) يعنى سيبلى سريرى علشان أنام ...ومتحولش ..متحولش تشاركنى فى أى أكل أحاول أكله..

س: إنت ياأخى مش سايبلى حاجه خالص.... كل حاجه هنا فرضت عليها سيطرتك وبعد ده كله أديك قاعد تبرق لى... (بخوف) ايه؟؟ بتبصلى كده ليه؟؟

(يتحول المشهد لمكتب)

ج: أنا... ..

س: حاضر يافندم حنفذ ..حنفذ كل اللى انت عاوزه ...حاضر...

ج :يا.....

نعم؟الملف بتاع الموظف (ك) حالاً يافندم دقيقة أو دقيقتين حيكون عند حضرتك...

ج : بسرعة

س: أفندم؟؟

ج : كثير دقيقة

س: دقيقة كثير؟؟

ج: انت حتناقشنى؟؟؟

س: أسف يافندم أسف ..حاضر حىكون جاهز قبل كده بكتير ..سيادتك اطمئن .

ج: بالنسبة للموظف (ص)

س:ماله؟؟

ج: مش عايزه .

س: انقله ؟

ج : اتصرف

س: حاضر

ج: استنى

س: أفندم؟؟

ج: هو انت ممكن تنقله فين؟؟

س: أنقله آخر الدنيا لو تحب

ج : مش كفاية

س: أفصله يافندم؟؟؟

ج: (فى محاوله أن يبتسم يارتياح)

س: إبتسامتك ريحتنى حاضر ..حاضر يا فندم حىكون مفصول.

ج: يا....

س: أفندم؟؟.

ج: متأخرش القرار

س: لا..أبدأ

ج: أمتى؟؟

س: بكرة بالكثير

ج : كثير

س: أوامرك..حاضر...(يؤدي التحية) كله سيكون تمام يافندم

ج : بدأت أبقى مبسوط منك يا س

س:أنا يافندم (ينحنى نحو المكتب بنفاق)..هدفى الأساسى والأسمى راحة وسعادة وإنتعاش وإزدهار

وإنتشار وعلو وسمو وإرتفاع عظمة سعادتك يافندم

ج: ابقى فكرنى اديلك علاوة

س:متشكر...متشكر يافندم

ج : إخذت الترقية بتاعتك؟؟؟

س: أيوه متشكر

ج: والبدرات والحوافز؟؟

س:أيوه يافندم

ج: يعنى مش ناقصك حاجه؟؟؟

س: الله يخليك. ويطول عمرك .. ده انت بابانا ياريس

ج: أنت موظف نشيط جداً

س:معظم زملائي يقولوا عليا كده برضو يافندم...أنشط موظف هنا (بخجل)

ج: هنا فين؟؟!

س: هنا يعنى يافندم فى إدارة سعادتك..

(يقترّب س من ج الجالس على مكتبه)

س: بس يافندم هو فيه موضوع...شاغلنى كنت عاوز أقول لسعادتك عليه..

ج: هو انت لسه هنا؟؟؟

س:ده يافندم إذا كان وقت وعظمة سعادتك تسمح بكده..وخصوصاً يافندم أن سعادتك وعظمتك الله

يكون فى عونك يافندم

(يتحركان فى إتجاه السرير)

س:سعادتك شايل عبأ كبير أعمال تكل عن حملها الجبال ..أعمال عظيمة يافندم ...أعمال تصغر فى عين

العظماء أمثالك يافندم ..

(ج يجلس نائماً على السرير)

ج : ياااااااااااا.....

س: نعم يافندم .

ج: ناولنى المخدة

س: أتفضل المخده ايه يافندم... إتفضل.

(ينتقل المشهد الى مشهد حواديتى مع موسيقى الف ليله وليلة)

س: تسمحلى سعادتك يعنى أقول لجنابك عن الموضوع اللي كنت يعنى عاوز أقوله لعظمتك .. هو الموضوع باختصار يعنى يافندم حرصاً على وقت عظمة سعادتك

ج : متطولش أنت تحتكيلي حدوته؟؟؟

س: أفندم؟؟

ج: وديت اللي قولتلك عليه البيت؟؟؟

س: ايوه يافندم وديته لحضرتك البيت..ايوه زى ماسياده حضرتك طلبت تمام.

ج: ٤ كيلو؟؟

س: لا يافندم تلاته كيلو ومعاهم الخضار اللي سعادتك طلبته.

ج :لحمة السيد (و) كويسة مش انت جبت من عنده برضو؟؟

س : لا يافندم مكنش عنده لحمه كويسة المرة دى عشان كده جبت من عند السيد (ع)

ج: (ع)؟؟؟

س: ايوه ده جزار كويس جداً ويعرف سعادتك من زمان.

ج : أنا؟؟؟

س: ايوه يافندم

ج : منين؟؟؟

س:يعرف سعادتك منين؟؟

ج: ايوه منين؟؟؟

س: من المناقصات يافندم اللى بيدخل فيها مع الشركة...و.....و..... (لحظه صمت يضحك فيها بنفاق

(

ج : متدخلش فى اللى ملكش فيه

س: أسف يافندم.

ج: مش عاوز اسمع الموضوع ده تانى

س: طبعاً محدش جيعرف حاجة ..

ج : ومتتكلمش فيه مع حد

س: مفهوم مفهوم

س: تسمحلنى سعادتك يعنى أقول على الموضوع اللى عاوز أكلم سعادتك فيه ..

ج : خلصنى

س: هو يعنى يافندم الأستاذ (ل) سعادتك عارف بتاع الميزانيات ده

ج :هو احنا عندنا ميزانيات

س: ..ايوه...أيوه يافندم .

ج : ل؟؟ل؟؟ ... اه الطويل ده؟؟؟

س: هو ده...هو يعنى هو يعنى يافندم الأستاذ(يتلجلج) الأستاذ (ل) أخذ ترقية إستثنائية

ج : إستثنائية؟؟!!!!

س:أيوه فى حين يعنى (بثورة) أنا أحق منه بكثير ..

ج : وأحق منه فى ايه بقى؟؟؟

س:سيادتك تعرف كفاءتى وخدماتى الجليلة (بثورة أشد) أنا أحق منه ياأستاذ؟؟؟؟

ج : إنت اتجنيت؟؟إزاي تتكلم معايا كده انت نسيت نفسك؟

(ينادى على الأمن)

يهيأ ل (س) ان أحداً يمسك به ويضربه بقوة)

س: ده إعتداء...ولن أسمح بيه...أيوه ده تخطى كل حدود معاملة الإنسان...أنا...أنا...أنا يتعمل معايا كده...

(ينزلان الى الصالة)

ج: ده تعدى كل الحدود...

س: وأنا مش حسكت...ومش حسيبك

(يعودان مرة أخرى الى المسرح يجلس كل منهما فى احدى الجوانب)

س: يفتح كتاب ..ثم يقفله: كلام فارغ..

ج :يقراه معاك حق كلام فارغ .

س : (يلقيه...ثم ياخذ غيره..وده برضو كلام فارغ

ج : يلتقط الكتاب الاخر ويتصفحه ثم يستطرد لاء فى دى معندكش حق.

س : إية؟؟

ج : كتك أوة

س : عايز ايه؟؟؟

ج : حتشوف ..

س : بتبصلى ليه؟؟؟

ج : حتعرف

س : ممكن يعنى تشوف حاجة تانيه تعملها وتسبنى ف حالى؟

ج : انا معنديش حاجة غيرك ..

س : أرجوك

ج : متتحايلش عليا عشان مش حسيبك

س : انا عندى حاجات كتيرة جداً

ج : ولو... متعطلينش

س : انت اللى معطلنى حتى عن حياتى

ج : طب انت عايز ايه دلوقتى؟

س : اتفضل

ج : شكراً

س: اتفضل من غير مطرود.

ج: وده معقول؟؟؟

س: ماهو مش معقول حتقعد تبصلى كده؟؟؟

(المشهد يتحول الى غرفة المعيشه وكل منهما يجلس امام تليفزيون يرتدى (س) فانلة برشلونة و (ج) يرتدى فانلة ريال مدريد...يزداد المشهد حماسة بينهما مع حماسة المباراة ويتحول المسرح فجأة الى ستاد ينقل المباراة ثم يتحول المشهد الى صراع بين (س) و (ج) بمجرد انتهاء المباراة وإعلان فوز فريق الريال مدريد ويتحول الصراع الى مشادة كلامية ثم ضرب)

س: عليا النعمة ميسى ده لعيب ملوش حل..واد ابن لذيئه

ج: ميسى مين ده كريستيانو برقبته

س: انتوا اساسا مبتفهموش فى الكورة انتوا اساسا كسبتوا بالكوسة وهى اصلا فرقة كوسة .

ج : انت باين عليك اتجنيت ومش جاييها لبر وانا حعرفك انا مين !

(يتحول المشهد الى تحقيق ويرتدى ج ملابس عسكرية)

ج: انت مقبوض عليك ومتحول تحقيق

س: نعم ..أفندم؟؟..تحقيق؟!..تحقيق أيه بس..

ج : انت عارف انت عملت ايه

س: يافندم أنا معملتش حاجه.

ج : امشى وانت ساكت

س: حاضر.. حاضر يافندم مش حفتح بّقى..

ج: الاسم؟

س: س ك س .

ج: رباعى

س: حاضر.. رباعى يافندم..يبقى س ك س ك

ج : السن؟؟

س: ٤٥ سنة

ج: بتشتغل ايه؟؟

س: الوظيفة يعنى...إنسان

ج : ماقولك فيما هو منسوب إليك؟

س: معملتش أى حاجة من اللى بيقولوه ده...دول كلهم مجانين...مجانين يافندم ..والغريبة أنهم بيقولوا
عليا مجنونون ...

ج: يعنى مين فيكوا اللى مجنون؟

س: مش عارف..

ج : يعنى ايه؟

س: مش عارف ايه الحكاية بالتحديد...لكن واجب على سيادتك كممثل للقانون إنك تفهم أن أنا عاقل...

ج : وانت اللى عملته ده يعمله واحد عاقل؟

س: أيوه (يضحك) و عاقل جداً وهما...هما..كلهم مجانيين ..ومحتاجين لعلاج (يشير للجمهور) ..كل دول محتاجين لعلاج يافندم..

ج : سيبك مين عاقل ومين مجنون وخش فى الموضوع

س:حاضر...حاضر يافندم..حخش فى الموضوع.....

ج : ايه الموضوع بقى؟

س: موضوع ايه يافندم..؟..ده مافيش موضوع خالص.

ج :مفيش موضوع؟؟ انت حتستهيل؟؟

س: ايوه مفيش أى موضوع

ج : يعنى ايه؟؟

س: أنا مش فاهم يعنى ايه بصراحة

ج : إذن مفيش موضوع

س: إزاي بقى مفيش موضوع..؟؟

ج : اذن يعنى انت بتنكر موضوع البواب

س: موضوع البواب؟؟؟ ايوه ايوه موضوع البواب .. (ن) ..أقول لحضرتك...البواب بتاعنا (ن) ده كان محيرنى جداً .

ج : ومحيرك إزاي بقى؟؟

س: أقول لحضرتك إزاي.. طول النهار... كل السكان وبدون إستثناء ينادوه : يانون... يانون.. ونون ده طالع نازل.. طالع نازل.. طول النهار ينفذ طلباتهم بدون إستثناء... إلا أنا .. أنادى عليه ميردش

ج : بيطنشك يعنى؟؟

س: بيطنشنى يعنى بالظبط كده مع إنى ديما بكلمه بأدب... وساعات ساعات كثيره أطلب منه حاجات من صميم عمله ولا يسأل فيا.

ج: ليه بقى هو كان ايه حكايته؟؟

معرفش.. معرفش ايه حكايته.. ده حتى السيد (ص) تاجر الخردة اللى ساكن فوقى.. ساعات بيعته ييجى عشرين ثلاثين مشوار (لحظة صمت)

ج : وهو ليه بيستجيب للسيد (ص) وانت لاء؟

س: معرفش ليه.. مع انى بعامله بشكل إنسانى جداً ..

ج: بتعامله بشكل إنسانى جداً امممم !!!

س: أيوه بعامله بشكل إنسانى فى حين أن (ص) تاجر الخردة ديماً يهينه ويشتمه ويضربه.. وانا مبعملش معاه كده ومع ذلك ينفذ طلبات السيد (ص) ... وأنا... وأنا... ولا أكنى موجود.!!؟؟

ده حتى مرة فى يوم من الأيام .. كنت راجع من الشغل تعبان جداً وأحتجت لطلب معين... وبالصدفة لقيت البواب نازل من عند الجيران اللى فوقى على طول... سلمت عليه بحراره.. رد السلام بمنتهى القرف.. استسمحته أنه ينفذ لى طلبى... سبنى.. سبنى ومشى.. نزل السلالم بسرعه.. ولا رد عليه حتى بكلمه واحده.

ج: يعنى انت بتنكر كل التهم الموجهه اليك؟؟

س: أنكرها كلها كاملة

ج: أكتب يبنى..أقفل المحضر فى ساعته وتاريخه وبناءاً عليه تم إحتجاز المتهم ٤ أيام على ذمه التحقيق

س: معملتش حاجة..معملتش حاجة

(ينزلان للصالة)

س: مش حسيبك..مش حسيبك

(يتحول المشهد الى المكتب)

س : يدخل المكتب دون إن يستأذن

ج: انت تانى؟؟ايه اللى جابك هنا اتفضل اطلع برا

س: يافندم أنا.....

ج : انت حيوان ..امشى اخرج برا

س: حيوان؟؟ ده انا حتى جاى عشان....

ج : انت جاى عشان تقتلنى؟؟ الحقونى ... الحقونى

ج : انت اصلا متحول تحقيق وموقوف عن العمل ازاي سمحوك تدخل هنا

س: تحقيق؟؟تانى تحقيق؟؟؟ هو انتوا موراكوش غيرى

(يجلس الاثنان على حافة المسرح ونستمع لبيان التنحى الخاص بالرئيس مبارك ثم صوت لمجموعة من

نشرات الاخبار التى تستعرض هذه الفترة من تاريخ البلاد وينتهى هذا المقطع بالإستماع الى قرار لجنة

أنتخابات التى تبث الإعادة بين محمد مرسى وشفيق يلىها قرار محاكمة مبارك وينتهى ببراءة كلاً من جمال وعلاء.....)

س: الله يخرىوتهم بيدمروا البلد

ج : متكلمش ف اللى ملكش فيه

س : وحق الناس؟؟

ج : جك كسر حقك

س: والناس اللى ماتت الله يرحمهم

ج :وأهالهم خدوا تعويضات

س: يعنى هو ده تمنهم؟؟

ج: مش يحمدوا ربنا؟؟ ده غيرهم بيموت ميبدفمش فيه فلوس

س: بس ده ببقى اسمه ظلم

ج : مش يمكن هو ده العدل

س: يعنى انت شايف أن العدل انك تطلع المتهم برئ

ج : على أد الأدلة الموجودة

س: الأدلة ممكن تكون مزورة

ج : ياشيخ؟؟

س: والإنتخابات مزورة

ج : ياشيخ

س: والمحاكمة مزورة

ج: ياشيخ

س: وحياتنا كلها مزورة

ج: ياشيخ

س: إحنا فى زمن...

ج : زمن ايه؟؟

س: معرفش

ج : يعنى ايه متعرفش

س: يعنى معرفش وخلاص

ج : آمال بتتكلم ليه

س: آمال عايزنى اخرص؟؟

ج : لاء.. قولتلك متتكلمش فى اللى ملكش فيه

س : بس دى بلدى

ج : لوحدك يعنى؟؟

س: واللى ماتوا دول أخواتى

ج : كل دول إخوانك؟؟

س: ايوه اخواتى.. بتوع بور سعيد اخواتى.. وبتوع العباسية اخواتى.. وبتوع ماسبيرو اخواتى وبتوع محمد محمود اخواتى..... وبتوع موقعة الجمل اخواتى... وبتوع التحرير كمان اخواتى.

ج : ربنا يزيد ويبارك

س: يعنى ايه؟؟

ج : عايز رأيى

س: اه عايز رأيك

ج: قوم اقف كده

س: وبعدين؟؟

ج: نقف دقيقة حداد

س: هو ده ردك؟؟

ج: إحمد ربنا

س: بس انا مش حسكت ..

(ينزلان للصالة)

س: مش حسكت يا ولاد.....

ج : تيبيبيبيبيب

س: انا حطلع.....

ج : تيبيبيبيبيب

س: مش حرتاح الا لما الاقيكو كلكو

ج : قیاسیت

س: عليا النعمة انا ممكن أعمل.....

ج : قیاسیت

(يعود المشهد مرة أخرى الى قاعة التحقيق)

ج : انت متهم بقتل مديرک في العمل ايه ردك على التهم الموجهه اليک؟؟

س: انا مقتلتوش بالعكس انا كنت رايح اعتذر له ودى مش أول مرة وهو كل مرة بيتشمنى ويطرمنى... كل مرة.... حاولت أعتذر له فيها.... كان بيضرب كل الأجراس اللى فى مكتبه.... ويلم عليا الموظفين والسعاه... الشركة كلها كانت تتلم عليا... وانا فى حقيقة الأمر مقصدش إلا أنى أعتذر له ..أيوه عاوز أعتذر له..(بيكى) ..أعتذر له..أعتذر له ..أعتذر له (ينسى بكاءه فجأه)...مجنون ...مجنون زيهم

(لحظة صمت 😐)

ج: بناءً على ماتقدم يتم تحويل المتهم الى مستشفى الأمراض العقلية

س: مستشفى؟؟ مستشفى ايه؟؟؟ انا مش مجنون هما اللي مجانيين

وانت..... أنت كمان..أيوه... أنت مجنون زيهم...زيهم تمام...وأكبر دليل على جنانك..قعدتك دى
..قاعد وعمال تبصلى.. كل حاجة أعملها تبصلى فيها...نفسى أعرف..أية لزمة قعدتك دى...ثم...ثم
نظراتك دى...تقصد منها ايه...شغلته ايه بالظبط لما..لما...أبص برضه ألاقك معايا وعمال تبصلى

حضرتك مش مخلينى أعمل أى حاجة بأرتياح مفيش حاجة واحده فى حياتى قادر أعملها بأرتياح... والسبب
بمنتهى البساطة قعدتك السوداء دى...

(لحظة صمت ☺)

ج : يقترب ببطئ من س

س : (بخوف)..أيه ده؟..أنت حتعمل ايه؟؟!!

ج : إهدى متخفش

س : حقن؟ ..

ج : ممش حتحس بحاجة

س : حبوب؟ جلسات كهرباء؟..

ج : يوووه وبعدين معاك قولتلك متخفش ومتخلينش استعمل القوة معاك

س : تستعمل القوه؟؟ليه؟؟!! ..أنا مش مجنون...أنا مش مجنون

(يبتعد عنه بخوف شديد... يهرب)

ليه أنا مش مجنون..أنا مش عاوز علاج..دول اللى مجانيين (يشير الى الجمهور)..دول كلهم عاوزين
علاج..عاوزين علاج يادكتور ..علشان مجانيين..علشان مصدقين..علشان شايفين وسامعين ومع ذلك
ساكتين

يقدرُوا يرفضُوا..

يقدرُوا يواجهُوا.

يقعدروا يصرخوا...

بس هما ساكتين.. مش عاجزين !!!... لكن سلبين... صبروا ليه سنين؟؟؟... وبعد كل ده لسه

مستسلمين... يبقوا كده مش مجانيين؟؟؟؟؟؟؟ دول كلهم مجانيين

(وكان شخص وهمي أمسك به بشده)

علجواهم علشان مجانيين... (بيكي بهستيريه) مجانيين... مجانيين

يأتي صوت من التلفاز يجذب إنتباه الجميع.....

قرر السيد الرئيس محمد حسنى مبارك حل مجلس الشعب ومنح المجلس العسكرى وسام الشرف تقديراً
لمجهوداته فى الحفاظ على أمن وسلامة البلاد والمواطنين كما أمر سيادته بصرف مكافأة لأسر الشهداء من
ظباط الجيش والشرطة الذين إستشهدوا فى الأحداث المؤسفة و إقامة نصب تذكارى لهم بميدان التحرير
تخليداً لذكراهم

والله الموفق والمستعان،،،

(😊 أغنيه إخترناك 😊)

النهاية